

Universitätsbibliothek Paderborn

Biennii Peripatetici

Complectens Quæstiones Logicales Una Cum Institutionibus Dialecticis Ad Antiquorum Recentiorumque Mentem Resolutas, Nec Non Juxta Modernam Scholarum Peripateticarum Methodum Elaboratas & Explicatas

Kretz, Marquard

Heripoli, 1749

Articul. III. An, & quomodò præmissæ necessitent intellectum ad inferendam conclusionem?

[urn:nbn:de:hbz:466:1-52248](https://nbn-resolving.de/urn:nbn:de:hbz:466:1-52248)

ARTICULUS III.

An, & quomodo Præmissæ necessitent intellectum ad inferendam conclusionem?

544. **N**ota. Duplex in hac thesi observanda venit potentia necessitas. *Prima est Necessitas contrarietatis*, sive *quoad speciem*, vi cujus potentia determinatur ad actus, & effectus certæ alicujus speciei, ita, ut non possit contrarios ponere. Sic Beati in cælis necessitantur ad actus amoris Dei, ut actus odii Dei ponere nequeant. *Secunda est Necessitas contradictionis*, sive *quoad exercitium*, quâ potentia habitis omnibus ad agendum requisitis, ita determinatur ad agendum, ut non possit suspendere, aut omittere actum; sic oculus positus omnibus ad videndum requisitis determinatur ad visionem eliciendam. Necessitati contrarietatis opponitur *Libertas contrarietatis*, quæ est indifferentia potentiae ad actus contrarios; sic voluntas potest idem objectum vel amare, vel odiare. Necessitati contradictionis opponitur *Libertas contradictionis*, vi cujus potentia agere potest, vel non agere. *Status questionis* est: An intellectus Præmissas, & vim formæ syllogisticæ penetrans, eisque assentiens ita determinetur, ut necessariò debeat assentiri conclusioni, an verò eidem possit dissentire? sive an necessitetur *quoad speciem actus*? Item: An stante assensu præmissarum intellectus necessariò elicere debeat conclusionem, ita, ut suspendere eam, vel omittere non possit? sive,

Kk 4

quod

520 DE DISCURSU IN GENERE.

quod idem est, an necessitetur quoad exercitium?

545. *Dico i.* Intellectus præmissis rite penetratis & concessis, nequit dissentire conclusioni. Ita Aristoteles *i. Poster. Cap. i. & i. Top. i. S. Thomas i. p. q. 82. a. 2. & i. 2. q. 13. a. 6.* Hos sequuntur plerique alii Philosophorum. *Ratio est:* Quia aliæ intellectus idem objectum eodem modo propositum posset affirmare, & negare. Item posset dissentire vero quâ tali. *Hæc autem implicat;* nam primum evertit principium lumine naturæ notum: *Idem non potest simul esse, & non esse.* Alterum verò est contra intellectus humani finem; ergo & implicat id, unde hæc sequuntur; nimirùm intellectum præmissis rite penetratis, & concessis posse dissentire conclusioni. *Primum assertum porrò sic probatur:* Intellectus concessis præmissis, jam concessit identitatem duorum cum uno tertio, quæ evidenter virtualis est identitas duorum inter se; igitur negando in conclusione identitatem duorum inter se, negaret id eodem modo propositum, quod affirmaverat in præmissis. *Alterum assertum ita stabilitur:* Ex supposito, quod intellectus concesserit præmissas rite penetratas, illasque agnoverit evidenter esse veras, hoc ipso etiam agnovit evidenter conclusionem esse veram, quæ in præmissis implicitè continetur; ergo si concessis præmissis negaret conclusionem, dissentiretur vero quâ tali; & consequenter intellectus contra suum ageret finem, qui est acquirere veritatem.

546.

546. *Dico 2.* Intellectus rite penetratis & concessis præmissis etiam nequit suspendere, vel omittere assensum conclusioni dandum, per se loquendo; sive necessitatur ad conclusionem inferendam quoad exercitium. *Ratio est:* Quia intellectus est potentia necessaria, quæ positis omnibus ad agendum requisitis debet necessariò agere. *Subsumo.* Sed intellectus in hac thesi supponitur habere omnia ad agendum requisi-
ta; supponitur enim, quod habeat concursum Dei, quod objectum ipsi sit propositum ut verum, quod concesserit præmissas, & non retractarit, quod sufficientem habeat cognitionem principiorum syllogisticorum, & virtutis consequentiæ; ergo concessis præmissis rite penetratis debet necessariò agere, & inferre conclusionem. Hanc ipsam sententiam videtur tenere Aristoteles, qui syllogismum ita definit: *Est oratio, in qua quibusdam positis aliud quiddam ab iis, quæ posita sunt, necessariò accipit, eo quod hæc sunt.*

547. *Obj. 1.* Concessis his præmissis: *Quod habet colorem, odorem, & saporem panis, est panis; sed particula consecrata habet colorem &c.* Intellectus non necessitatur ad hanc conclusionem hæreticam: *Ergo particula consecrata est panis;* ergo intellectus concessis etiam præmissis non necessitatur ad inferendam conclusionem. *R. D. ant.* Non necessitatur ad conclusionem illam hæreticam stante assensu præmissis dato. *N.* si revocet assensum, sicut revocare tenetur. *C.* Nimirum præmissæ assignatæ universaliter con-

522 DE DISCURSU IN GENERE.

cedi nequeunt, quia ejusmodi accidentia saltem supernaturaliter existere sine subiecto valent. Idem respondendum ad has præmissas: *Quæ sunt eadem uni tertio, sunt idem inter se; sed tres Personæ divinæ sunt idem uni tertio*, scilicet cum essentia divina. Nam & hæc præmissæ non possunt sine distinctione concedi. *Vide dicta de hoc principio in Prolegomenis n. 22.* Item ad has: *Omnis homo est mendax; sed Christus est homo.* Major enim intelligenda tantum est de puro homine. *Inst. 1.* Saltem intellectus non necessitatibus ad conclusionem, quando hæc est actus fidei; quia fides debet esse libera. *R. N.* Nam conclusio formaliter talis, ad quam intellectus necessitatur, non est actus fidei; sed materialiter talis. *Inst. 2.* Concessis præmissis sæpè negatur consequentia; ergo. *R. D. ant.* Negatur consequentia illegitima, & vitiosa. *C. legitima.* *Subdist.* Præmissis benè penetratis. *N.* non benè penetratis. *C.* Adde quod negans consequentiam illegitimam, nisi omnino dispara-
rata sit, transmittat potius præmissas, quam ut eas concedat, ex eo tantum fine, ut vitium syllogismi assignet, quod assignando simul indicat, quo sensu assensum præmissis datum re-
vocet, & quo sensu illum stabilit. *Inst. 3.* Con-
clusio est sæpè probabilis tantum; sed ad talem intellectus non necessitatur, quia huic assenti-
tur cum formidine de opposito; ergo. *R. D. maj.* Conclusio materialiter sumpta, vel ratione consequentis, aut materiæ est probabilis tantum. *C. Conclusio formaliter spectata, ratione formæ,*
vel

vel consequentiæ. N. Si ait: Conclusioni probabili seorsim spectatae, & extra syllogismum intellectus non assentitur necessariò; ergo nec intra syllogismum. R. D. Cons. Ergo nec intra syllogismum eidem necessariò assentitur antecedenter, h. e. ante concessas præmissas. C. consequenter, & præmissis concessis. N. Ratio autem ulterior est; quia hoc ipso, quod intellectus dederit assensum præmissis probabilibus, implicitè jam & virtualiter concessit conclusionem, igitur nequit eandem postea negare; alias sibi contradiceret. Si reponas. Præmissis probabilibus non necessariò assentior; ergo nec conclusioni ex illis deductæ. R. N. Cons. Ob rationem jam datam; conclusioni enim jam dedi assensum in præmissis saltem virtualiter, & per hoc intellectus est necessariò determinatus ad assentiendum conclusioni, ne sibi contradicat. Econtra intellectus non est aliunde determinatus ad necessariò assentiendum præmissis probabilibus. Si urgeas: Conclusio syllogismi probabilis non habet evidenter veritatem; ergo ei intellectus non necessariò assentitur. R. D. ant. Non habet evidenter veritatem, si præmissæ non sint concessæ ut veræ. C. si sunt concessæ ut veræ. Subdist. Non habet evidenter veritatem consequentis. C. consequentiæ. N. Si enim intellectus concessit, duo esse probalites idem cum uno tertio, evidenter sequitur; illa probabiliter quoque esse idem inter se. Proinde præmissæ probabiles non necessitant ad conclusionem præcisè ratione sui; sed ratione concessio-

nis.

524 DE DISCURSU IN GENERE.

nis, & ut sunt evidenter propositæ tanquam probabiles, unà cum principio regulativo: *Quæ sunt eadem uni tertio, eo modo, quo sunt eadem uni tertio, sunt eadem inter se.* Si nimirùm duo extrema sint evidenter eadem uni tertio in præmissis, etiam sunt evidenter eadem inter se in conclusione: Et si sint probabiliter eadem uni tertio, etiam sunt probabiliter eadem inter se; quod utrumque evidens est.

548. *Obj. 2.* Intellectus subjacet imperio voluntatis; ergo hæc concessis etiam præmissis ab assensu conclusionis avertere intellectum potest. *R. D. ant.* Subjacet imperio voluntatis *despotice.* *N. politice.* *C. h. e.* Intellectus non subjacet voluntati in suum malum, ut nimirùm id, quod ipsi proponitur evidenter verum, judicet falsum, aut vicissim falsum judicet verum; aut ut ritè applicatus, non rapiatur in id, quod ei evidenter proponitur. Sed subjacet duntaxat voluntati in suum bonum, quatenus voluntas applicare intellectum potest, ad agnoscendum verum. Alii dicunt, Intellectum subjacere voluntati in iis tantùm, in quibus evidens veritas non appareat, non autem in iis, in quibus hæc evidenter cognoscitur: In his enim intellectus, ex supposito, quod sit applicatus, est potentia necessaria; sicut igitur voluntas oculo debitè applicato imperare nequit, ut non videat; ita nec intellectui applicato imperare vallet, ut non assentiatur objecto evidenter sibi proposito. *Inst. 1.* Licet potentia loco motiva sit potentia necessaria, imperio tamen voluntatis

tatis subjacer; ergo & intellectus. *R. N. Conf.*
Disp. est; Quia potentia loco motiva cognoscitiva non est, hinc aliunde determinari nequit, nisi à voluntate, adeoque secundum se totam voluntatis imperio subest. Econtra intellectus, utpote cognoscitivus determinari potest ab evidente objecti veritate, vel ab evidentia consequentiæ, ut sit in syllogismo probabili. *Nec obstat D. Thomas,* qui intellectum cum potentia loco motiva comparat: nam non comparat in omnibus, sed in aliquibus solum scilicet in obscuris. Vide responsionem secundam supra ad objectionem datam. *Inst. 2.* Ex iisdem præmissis possunt persæpè variæ deduci conclusiones, v. g. universalis, vel particularis, in modo directo vel indirecto; ergo saltem in hoc casu intellectus suberit imperio voluntatis; quia non est ratio, cur potius hanc, quam illam eliciat. *R. N. Conf.* Nulla hic opus est determinatione voluntatis; si enim Intellectus præmeditatur figuram, aut modum, tunc elicet conclusionem illi figuræ, aut modo congruam. Si verò non præmeditatur, tunc elicet illam, quæ primo occurret. *Inst. 3.* Intellectus concessis etiam præmissis distrahi potest; ergo saltem in hoc casu non necessitatur. *R. D. Conf.* Non necessitatur *per accidens.* C. *per se.* N. Hinc in conclusione secunda jam addidi particulas: *Per se loquendo.* *Inst. 4.* Supposito, quod Deus revelaret has præmissas: *Quidquid Deus revelat est verum; sed Deus revelat in syllogismo non fore tres propositiones; intellectus has concedens necessitari*

526 DE DISCURSU IN GENERE.

cessitari non posset ad conclusionem, quæ fo-
ret propositio tertia; ergo. **R. I. C.** *Totum*
sed nego, quòd hic casus ad præsentem quæ-
stionem pertineat; eoquòd Deus positâ reve-
latione suâ negare deberet concursum, ad pro-
positionem tertiam, consequenter intellectus
non haberet omnia ad agendum requisita, quæ
tamen illum habere thesis hæc supponit. **R. 2.**
Si velis prædictum casum huc spectare, tunc
nego antecedens; quia minor intelligenda tan-
tum foret in sensu accommodo, excepto nimi-
rùm præsenti syllogismo. *Inst. 5.* Apprehe-
nsio etiam evidentissima non necessitat ad judi-
cium; ergo nec judicium evidens, quale est in
præmissis, necessitat ad conclusionem. **R. N.**
Conf. Disp. est: Quia apprehensio non est vir-
tualiter ipsum judicium; at verò identitas duo-
rum cum uno tertio, est evidenter virtualis
identitas duorum inter se; hinc admittens iden-
titatem duorum cum uno tertio, virtualiter ad-
misit identitatem eorundem inter se. *Inst. 6.*
Asentiens uni contradictorio, virtualiter dis-
sentit alteri, nihilo tamen minùs ad formalem dis-
sensum contradictorii alterius non necessitatur;
ergo à pari. **R. D. ant.** Non necessitatur ad dis-
sensum formalem, si alterum contradictorium
non occurrat formaliter. **C.** si occurrat, sicuti
in præmissis proponitur intellectui objectum
conclusionis. **N.** *Inst. 7.* Voluntas non nec-
sitatur ad amorem ab ullo bono creato; ergo
nec intellectus necessitatur ad assensum ab ullo
vero. **R. N. Conf. Disp. est:** Voluntas est po-
tentia

tentia libera, quæ positis omnibus ad agendum requisitis agere potest, vel non agere. Contra intellectus est potentia necessaria, quæ positis omnibus ad agendum requisitis necessariò agit.

ARTICULUS IV.

An ad assensum conclusionis requiratur cognitio reflexa de bonitate consequentiae?

549. **N**ota. Per cognitionem reflexam de bonitate consequentiæ intelligitur hic actus specialis, & realiter à præmissis formalibus, & conclusione formalí distinctus, vi cuius intellectus, antequam concessis præmissis conclusionem eliciat, specialiter se reflectit super præmissas, & conclusionem, videtque signatè, ac reflexè, an talis conclusio è talibus præmissis benè sequatur? Quæritur proinde hic de tali actu speciali; an requiratur ad eliciendam conclusionem? Ecce tibi statum quæstionis in exemplo: Quæritur, an intellectus concessis v. g. his præmissis: *Omne animal est vivens; sed Petrus est animal;* debeat priùs elicere actum, quo v. g. sic dicat: *Ex eo, quod omne animal sit vivens, & Petrus sit animal, benè sequitur hæc conclusio: Petrus est vivens:* atque posito hoc judicio reflexo, deinde modò ponat conclusionem: *Ergo Petrus est vivens?* Ex his advertes, quæstionem hic potissimum esse de præmissis objectivis. Nam, quod conclusio non necessariò se reflectat in præmissas formales, Communior est Philosophorum: hæ enim non re-

qui-